



Xalq so'zi

O'zbekiston —
kelajagi
buyuk
davlat

2025-YIL — ATROF-MUHITNI ASRASH VA “YASHIL” IQTISODIYOT YILI

1991-yil 1-yanvardan chiqa boshlagan

WWW.XS.UZ

E-mail: Info@xs.uz

2025-yil 21-avgust, № 170 (9065)

Payshanba

Saytimizga o'tish uchun QR-kodni
telefoningiz orqali skaner qiling.



TARAQQIYOTNI TA'MINLAYDIGAN, DAVLATNI BOY, XALQNI FAROVON QILADIGAN KUCH

Yangi Toshkentda O'zbekiston Respublikasi Prezidentining tadbirkorlar bilan ochiq muloqoti bo'lib o'tdi.



Ma'lumki, davlatimiz rahbarining tadbirkorlar bilan ochiq muloqot shaklidagi ilk uchrashuvi 2021-yil 20-avgustda o'tkazilgan edi. O'shanda Prezidentimiz bunday tadbirni har yili uyushtirish va 20-avgustni “Tadbirkorlar kuni” deb e'lon qilishni taklif etgandi.

Mana, besh yildirki, Tadbirkorlar kuni yurtimizda keng nishonlab kelinmoqda. Yurtboshimizning ishbiarmonlar bilan uchrashuvi esa an'anaviy tus oldi. Bunday ochiq va yuzma-yuz muloqotlarda tadbirkorlarni o'ylantirayotgan masalalar muhokama etilib, ular ilgari surayotgan tashabbuslar, ko'tarilayotgan masalalar qabul qilinayotgan

hujjatlarda aks etyapti. Shubhasiz, bu Prezidentimizning tadbirkorlik sohasiga qaratayotgan alohida e'tiborining yorqin ifodasidir.

Bu galgi uchrashuv avvalida davlatimiz rahbari tadbirkorlarni kasb bayrami va tobora yaqinlashib kelayotgan mustaqillikning 34 yilligi bilan tabrikladi. Tadbirkorlar harakati yil sayin rivojlanib, barcha soha va hududlardagi o'zgarishlarda yetakchi kuchga aylanib borayotgani alohida e'tirof etildi.

Darhaqiqat, oxirgi sakkiz yilda 230 milliard dollar investitsiya kiritilib, iqtisodiyotning ko'plab tarmoqlari yangidan tashkil etildi. Ayniqsa, biznes yuritishdagi qulayliklar natijasida

tadbirkorlar safi kengayib, faoliyati sifat jihatdan yangi bosqichga ko'tarilmoqda. Bu haqda so'z yuritilganda, 1 600 ta mikrokorxona bir yil ichida aylanmasini 10 milliard so'mdan oshirib, birdaniga o'rta korxonaga, 143 tasi esa 100 milliard so'mdan oshirib, yirik korxonaga aylanganini, yana 122 ta kichik korxona yirik biznes subyektlari safiga qo'shilganini alohida ta'kidlash joiz.

Joriy yilning birinchi yarmida mamlakatimiz iqtisodiyoti 7,2 foiz o'sdi. Bunday barqaror o'sish sur'atlari ta'minlanishida tadbirkorlik harakati drayverga aylandi, desak, mubolag'a bo'lmaydi.

Ilk ochiq muloqotdan buyon

tadbirkorlarning mingga yaqin tashabbuslari qonunchilikka kiritilgani qayd etildi. Bu galgi muloqotga tayyorgarlik davomida 26 ta sohaning 7 mingga yaqin vakillari bilan uchrashuvlar o'tkazildi. “Call-markaz” orqali ham 13 mingdan ziyod murojaat va tashabbuslar qabul qilindi.

Muloqotda davlatimiz rahbari tomonidan tadbirkorlikni rivojlantirish bo'yicha yangi tashabbuslar ilgari surildi. Jumladan, qisqa muddatda va tez daromad beradigan ish o'rinlari yaratishda eng samarador yo'nalishlardan biri bo'lgan xizmatlar sohasi jadal rivojlantiriladi. Turizmni rivojlantirish bo'yicha yangi dastur boshlanadi. Kelgusi uch yilda

mehmonxona va turizm maskanlari tashkil qilish uchun jami 5 ming gektar yer auksionga chiqariladi. Bunda mehmonxona qurmoqchi bo'lgan tadbirkorlardan yerlarni sotib olish uchun to'lov undirilmaydi. Evaziga davlat shu summa bilan loyihaga ulushdor bo'lib kiradi.

Tadbirkorlar 10 yil ichida istalgan paytda mazkur ulushni qayta sotib olishi mumkin bo'ladi. Agar tadbirkor yer qiymatini boshida to'layman desa, 20 foiz chegirma beriladi. Mehmonxona qurish uchun 7 yil muddatga 2 yillik imtiyozli davr bilan kredit ajratiladi.

Prezidentimiz mahalliy mehmonxonalar, oilaviy mehmon uylari o'rtasida tanlov o'tkazish taklifi

ilgari surdi. Tanlovning mukofot jamg'armasi 1 million dollar bo'ladi, sayyohlar e'tiborini qozongan, nufuzli xalqaro platformalarda eng ko'p ijobiy e'lon olgan mehmonxonalar har yili taqdirlanadi.

Bu yil 16 ta tumanni jadal rivojlantirishga 1 trilion so'mdan ziyod mablag' yo'naltirildi. Kelgusida yana 500 million dollar hisobiga boshqa tumanlarda ham ana shunday ishlar amalga oshiriladi. Bu sanoat, servis, qurilish sohaslaridagi tadbirkorlarga katta imkoniyat, yuz minglab ish o'rinlari yaratish uchun sharoit bo'ladi.



O'zbekiston Respublikasi Prezidenti Matbuot xizmati suratlari.

O'ZBEKISTON RESPUBLIKASI PREZIDENTI SHAVKAT MIRZIYOYEVNING TADBIRKORLAR BILAN OCHIQ MULOQOT SHAKLIDA O'TKAZILGAN UCHRASHUVDAGI NUTQI

Assalomu alaykum, qadrlı vatandoshlar!

Hurmatli tadbirkorlar, anjuman ishtirokchilari!

Avvalambor, sizlar bilan eng ulug', eng aziz ayym – Vatanimiz mustaqilligining 34 yillik bayrami oldidan uchrashib turganimdan behad xursandman.

Bugun shuni faxr bilan ayta olamizki, yurtimizda yaratilayotgan har bir ish o'рни, qad ko'tarayotgan har bir korxona, xalqimizning og'irini yengil qilayotgan har bir xizmat, eksport bo'layotgan har bir mahsulot – sizning jasorat bilan qilayotgan mehnatingiz, tashabbus va izlanishingiz mahsulidir.

Bugungi tadbirimizni shunchaki anjuman emas, davlat va biznes o'rtasidagi o'zaro ishonchni mustahkamlashga xizmat qiladigan jonli va samimiy muloqot maydoni, desak, to'g'ri bo'ladi.

Biz islohotlarimizning ilk kunlaridanoq sizlar bilan hamfikir bo'lib, iqtisodiyoti qudratli, sanoati raqobatbardosh, moliyaviy tizimi barqaror, barcha sohalari investorlar uchun jozibador bo'lgan Yangi O'zbekistonni barpo etishga kirishdik.

Adolatli hakam bo'lsa aytgin, o'tgan sakkiz yilda qattiq mehnat va mashaqqatlar bilan iqtisodiyotimizning ko'plab tarmoqlarini yo'qdan bor qildik. E'tibor bering, bu davrda turli sohalarga 230 milliard dollar investitsiya kirib keldi, shundan 120 milliarddan ortig'i – xorijiy sarmoya.

Bir qarashda aytishga oson bo'lgan ushbu raqamni oldinlari hisob-kitob qilish tugul, tasavvur qilib ham bo'lmaydi. Lekin biz buni uddaladik.

Turli nizo va ziddiyatlar tufayli jahon iqtisodiyoti g'oyat murakkab davrni boshidan o'tkazayotgan bir

vaqtda, pragmatik va proaktiv siyosatimiz tufayli, bu yil birinchi yarim yillikda iqtisodiyotimiz 7,2 foizga o'sdi.

Bu yutuqlarimizning barchasi – sizlar bilan birgalikda qilgan mashaqqatli mehnatimiz mahsuli, albatta.

O'tgan davrda minglab mikro va kichik korxonalar qisqa muddatda yaratilgan sharoitlardan samarali foydalanib, katta-katta kompaniyalar bilan raqobat qila boshladi. Masalan, 1 ming 600 ta mikrokorxona bir yil ichida oborotini 10 milliard so'mdan oshirib, birdaniga o'rta korxonaga, 143 tasi esa 100 milliard so'mdan oshirib, yirik korxonaga aylandi. Yana 122 ta kichik korxona oldinga ikki qadam sakrab, yirik biznes safiga qo'shildi.

O'tgan yili oboroti 1 trilion so'mdan oshgan 203 ta korxona bor edi. Bu yilning o'tgan olti oyida ularga qo'shimcha yana 47 ta korxona 400 – 500 milliard so'mlik marrani zabt etdi. Nasib qilsa, yil yakunigacha ular ham bemaol “trillionchilar” safiga qo'shiladi.

Biznesni “soya”dan chiqarish bo'yicha yangi mexanizmlarni ko'paytirganimiz hisobidan 139 mingta korxonada ish o'rinlari 811 mingtaga ko'payib, 2,2 milliondan 3 millionga yetdi. 273 mingta korxona ish haqi fondini 22 foizga yoki 4,6 trilion so'mga oshirdi.

O'tgan yili xususiy sektorda o'rtacha oylik 4 million so'mni tashkil qilgan bo'lsa, bugungi kunda 5 million so'mga yaqinlashdi.

Men bu misollarni nima uchun aytayman? Odamlarimiz tadbirkorlikning hadisini olib, ishbiarmonga aylandi, yurtimizda barqaror rivojlanayotgan yangi biznes hamjamiyati shakllandi.

Aziz do'stlar!

An'anaga ko'ra bu yil ham kichik biznes vakillaridan tortib yirik korxonalar rahbarlarigacha – eng ilg'or va fidoyi tadbirkorlarimizning 49 nafari davlat mukofotlari, 112 nafari esa “Faol tadbirkor” ko'krak nishoni bilan taqdirlandi. Ularning orasida

ilmi, tafakkuri bilan biznes rivojiga katta hissa qo'shayotgan olimlarimiz ham bor.

O'tgan bir yilda yana 52 nafar ishbiarmon tadbirkorimiz, mirishkor dehqon va fermerlarimiz, tashabbuskor investorlar orden va medallar sohibiga aylandi. Ayniqsa, homiylik qilib, bog'cha va maktab, shifoxonalar qurayotgan, ehtiyojmand oilalarga ko'maklashayotgan, yoshlarni qo'llab-quvvatlayotgan saxovatpesha tadbirkorlarimiz ko'payib borayotgani bizni quvontiradi.

Hech shubhasiz, o'g'il-qizlarimizni sportga jalb qilish uchun katta sharoit yaratib berayotgan, ularning jahon va qit'a, Olimpiya hamda Paralimpiya o'yinlari, boshqa nufuzli xalqaro musobaqalarda yuqori cho'qqilarni zabt etishiga ko'maklashayotgan biznes vakillari yurtimizning chinakam fidoyilari.

Ushbu zalda ham, hududiy studiyalarda ham ularning ko'pchiligini ko'rib turibman. Sizlarning fidokorona mehnatingiz tadbirkor bo'lgan degan minglab o'g'il-qizlarimiz uchun ilhom manbaiga aylanmoqda.

Fursatdan foydalanib, siz, hurmatli tadbirkorlarga, sizlar orqali butun respublikamizning biznes vakillariga o'zining chuqur va samimiy minnatdorigini izhor qilaman. Bayramingiz muborak bo'lsin!

Qadrlı biznes vakillari! Ilk ochiq muloqotimizdan buyon shu kungacha sizlarning mingga yaqin tashabbusingiz qonun va qarorlarda o'z aksini topdi. Buning natijalarini nafaqat tadbirkorlar, balki oddiy odamlar ham o'zining kundalik hayotida his qilmoqda.

Anjumanimiz ulkan bunyodkorlik ishlari boshlangan Yangi Toshkentda o'tayotganida albatta ramziy ma'no mujassam. Ushbu megaloyiha **islohotlarimiz hayotda qanday aks etayotganining yaqqol isboti, yangilanish va taraqqiyot yo'lidagi dadil qadamlarimizning yorqin timsoli** bo'ladi.

Siz, tadbirkorlar uchun **Yangi Toshkent – yangi imkoniyatlar, yangi g'oyalar va yangi bozorlar**

maydoniga, innovatsiyalar va investitsiyalar markaziga aylanadi.

Bu yerdagi to'liq “yashil” texnologiyalarga asoslangan eng zamonaviy infratuzilmalar sizlarning ko'plab g'oya va tashabbuslaringiz uchun xizmat qiladi.

Shuni bilingki, Yangi Toshkent darvozalari biznes qilaman, degan barcha tadbirkorlar uchun hamisha ochiq bo'ladi.

Aziz yurtdoshlar!

Bugungi ochiq muloqotga tayyorgarlik davomida 26 ta sohaning 7 mingga yaqin vakillari bilan alohida uchrashuvlar o'tkazildi. “Call-markaz” orqali ham 13 mingdan ziyod murojaat va tashabbuslar kelib tushdi.

Hozirgi murakkab sharoitda har bir kun muhimligini inobatga olib, ochiq muloqotni kutib o'tirmasdan, meva-sabzavot eksporti va to'qimachilikda to'planib qolgan muammolarga yechim topib berdim.

O'tgan haftada biznesni “soya”dan chiqarishni rag'batlantirish bo'yicha ham tadbirkorlarga yanada qulay sharoitlarni nazarda tutgan katta-katta yangiliklarni e'lon qildik.

Birinchi. Yurtimizda 300 mingga yaqin yakka tartibdagi tadbirkorlar, yana 5,5 million nafar o'zini o'zi band qilgan shaxslar faoliyat yuritmoqda.

Asosiy maqsadimiz – ishini kichik loyihadan boshlab, biznesda tajriba va malaka to'plagan mana shunday tadbirkorlarga ko'mak berib, ularni 50 – 100 nafar odam ishlaydigan baquvvat korxonalar sohibiga aylantirish.

Shu bois o'tgan haftada yakka tartibdagi tadbirkorlar va o'zini o'zi band qilgan shaxslar uchun 2030-yilgacha maxsus huquqiy rejimni joriy etish bo'yicha qarorni imzoladim.

Endi bunday tadbirkorlar uchun ro'yxatdan o'tishdan tortib hisobot topshirishgacha bo'lgan barcha xizmatlarni jamlagan raqamli platformalar yaratiladi. Bunda tadbirkorlar kerakli hujjatlarni masofaviy biometriya va SMS xabarnoma orqali elektron kalitsiz imzolashi mumkin. Ishchilarga

elektron hamyon orqali kunbay, soatbay maosh to'lash imkoniyati yaratiladi.

Mamlakatimizda 40 dan ziyod elektron to'lov tashkilotlari mavjud bo'lib, aholimiz o'ziga qulay mobil ilovadan foydalanmoqda. Bu – naqdsiz to'lovni rag'batlantirish uchun eng yaxshi instrument. Endi 1-noyabrdan boshlab tadbirkorlar uchun barcha mobil to'lov ilovalari orqali hisob-kitob qilish imkonini beradigan universal “Kyu-ar” kod beriladi.

Yana bir yangilik – yillik aylanmasi 1 milliard so'mgacha bo'lgan barcha tadbirkorlar kelgusi yil 1-yanvardan bir xil, ya'ni oborotidan 1 foiz soliq to'lashga o'tkaziladi. Masalan, hozir oboroti 100 million so'mgacha bo'lgan yakka tadbirkor yillik 12 million so'mgacha qat'iyy soliq o'rniiga ko'pi bilan 1 million so'm to'laydi. Yoki oboroti 100 milliondan 1 milliard so'mgacha bo'lgan tadbirkor aylanmadan ilgari 30 – 40 million so'm soliq to'lagan bo'lsa, endi uning soliq yuki 3-4 karra kamayadi.

Umuman, yaratilayotgan sharoitlar orqali yakka tadbirkorlar hisobida yiliga 1 trilion so'm, tasavvur qilyapsizlarmi, 1 trilion so'm qolyapti.

Bu – kichik biznes uchun qo'shimcha resurs, yakka tadbirkorlar o'z biznesini keyingi bosqichga olib chiqishi uchun yana bir imkoniyat.

Bu sizlarga ma'qulmi?

Ikkinchi. O'tgan haftada 200 dan ortiq to'qimachilik korxonalari vakillari bilan uchrashib, sohani qo'llab-quvvatlash bo'yicha 7 trilion so'mlik tashabbuslarni e'lon qildik.

Tez kunlarda to'qimachilikda “ishonchli eksportchi” dasturini boshlab, eksportoldi moliyalash tizimi yo'lga qo'yiladi va buning uchun 200 million dollar yo'naltiriladi.

Bu – elektrotexnika, qurilish materiallari, oziq-ovqat, farmatsevtika kabi eksport salohiyati yuqori, lekin imkoniyatlari to'liq ishga solinmagan sohalar uchun ham joriy etiladi. Ushbu sohalardagi tadbirkorlarning aylanma mablag'i uchun 500 million dollar beriladi.

(Davomi 2-betda).



TARAQQIYOTNI TA’MINLAYDIGAN, DAVLATNI BOY, XALQNI FAROVON QILADIGAN KUCH



Biznes vakillarida qoʻshimcha joy olishga ehtiyoj bor. Shu munosabat bilan kelgusi yildan davlat aktivlari besh yilga ijaraga beriladi. 1991-yilda qabul qilingan "Ijara to'g'risida"gi Qonun, asosan, davlat organlari manfaatini himoya qilishga qaratilgani qayd etildi. Shu bois ijaraga beruvchi va ijarachi huquqlarini birdek himoya qiladigan yangi tahrirdagi qonun ishlab chiqilishi aytiladi.

Muloqotda ta'lim va tibbiyot sohalariga oid imkoniyatlar ham belgilandi. Unga ko'ra tibbiyot klasterlarini barpo etgan tadbirkorlarga 7 yil muddatga, 3 yil imtiyozli davr bilan 17 foizli arzon kreditlar beriladi.

Prezidentimiz biznesni qo'llab-quvvatlashning eng muhim instrumenti – moliyaviy xizmatlar ekanini ta'kidladi. Shu bois endi loyihaga soddalashtirilgan tartibda mablag' jalb qilish bo'yicha investitsiya platformasi ishga tushiriladi. Tadbirkorlar ushbu yangi tizim orqali yiliga qo'shimcha 1 milliard dollar mablag' jalb qilish imkoniyatiga ega bo'ladi.

Ma'lumotlarga qaraganda, hozir O'zbekistonda 600 dan ziyod startaplar faoliyat yuritmoqda. Shu yilning o'tgan yetti oyida startaplarga rekord miqdorda – 264 million dollar xorijiy investitsiya kirib keldi. Shu bois ushbu yo'nalishdagi ishlar izchil davom ettirilgan holda, yoshlarning mingta startap g'oyasi

tijoratlashtiriladi va shundan 200 tasi xalqaro bozorga olib chiqiladi. Eng ilg'or texnologiyalar olib kelinib, 100 ta mahalliy startap xalqaro miqyosda jozibador biznesga aylantiriladi. Bunga 100 million dollar beriladi.

Yana bir yangilik, endilikda moliyalashtirishda muqobil scoring modeli ishga tushirilib, kredit berish shartlari osonlashtiriladi. Kelgusi yilda banklar tomonidan kichik va o'rta tadbirkorlikni maqsadli qo'llab-quvvatlash uchun qulay shartlarda 1 milliard dollar jalb qilinadi.

Uchrashuvda soliq ma'murchiligi masalalariga ham to'xtalib o'tildi.

Amaldagi tartibga ko'ra, yillik aylanmasi 10 milliard so'mdan oshgan korxonalar foyda solig'i bo'yicha bo'nak to'lagani uchun aylanma mablag'dan qiyinchilik yuzaga kelmogda. Shu bois endi bu tartib 20 milliard so'mdan oshganda qo'llanishi belgilandi. Natijada 14 mingga yaqin tadbirkorlar ixtiyorida qo'shimcha 1 trillion so'mlik aylanma mablag' qoladi.

Aylanma soliqdan qo'shilgan qiymat solig'iga o'tadigan korxonalar bir yil davomida foyda solig'i to'lashdan ozod qilinadi, hisobotida xatolik bo'lsa ham jarima qo'llanmaydi.

Prezidentimiz Investitsiya kodeksini qabul qilish tashabbusini ilgari surdi. Bu kodeks investitsiya sohasidagi barcha qoida, kafolat va tartib-taomillarni

bir tizimga solib, investitsiyalarni rag'batlantirishga xizmat qilishi ta'kidlandi.

Davlatimiz rahbari yana bir muhim yangilikni e'lon qildi. Bu yerda gap 2026-yildan e'tiboran "Biznesni 15 daqiqada boshlash" tamoyili yo'lga qo'yilishi haqida bormogda. Bunda tadbirkorni ro'yxatdan o'tkazish vaqtidayoq elektron raqamli imzo beriladi, bankda hisob raqam ochiladi, sohaga mas'ul davlat organlariga xabarnoma jo'natiladi. Majburiy sertifikatlanadigan tovarlar ro'yxati 459 taga qisqartirildi. Ro'yxat yana 288 taga kamaytiriladi.

Muloqotda qayd etilgan imkoniyatlar bugundanoq kuchga kirishi qayd qilindi. Ochiq muloqot tarzida davom etgan tadbirda markaziy va hududiy studiyalardan qatnashgan tadbirkorlar o'z fikr va takliflarni bildirdi. Muammolar muhokama qilinib, ular bo'yicha mutasaddilarga ko'rsatmalar berildi.

Davlatimiz rahbarining tashabbusi bilan shakllangan ezu an'anaga muvofiq, har yili ilg'or tadbirkorlar Vatanimizning yuksak mukofotlari bilan taqdirlanmogda. Bu yil ham Tadbirkorlar kuni munosabati bilan Prezidentning tegishli Farmoniga muvofiq, mamlakatimiz iqtisodiy qudrati va eksport salohiyatini oshirayotgan, aholi bandligi hamda farovonligini ta'minlash yo'lida jonbozlik ko'rsatayotgan bir

guruh tadbirkorlar faxriy unvonlar, orden va medallar bilan mukofotlandi.

Yangi Toshkentda mazkur mukofotlarni tantanali topshirish marosimi bo'ldi.

– Bugungi marosimda yetakchi tadbirkorlarni, jamiyatimizning eng ilg'or vakillarini ko'rib turganimdan xursandman. Bu sohada katta islohotchlarni boshlaganimizda iqtisodchilarda ham, tadbirkorlarning o'zida ham qandaydir qo'rquv bor edi. Lekin ishonch bilan, shijoat bilan imkoniyat yaratishdan to'xtamadik. Mutasaddilarni tadbirkorlarni eshitishga majbur qildik. Bu o'z natijasini berdi, davlat bilan tadbirkorlar o'rtasida ishonch oshib bordi. Butun jamiyat tadbirkorga do'st bo'ldi, – dedi Shavkat Mirziyoyev.

Yurtimiz tadbirkorlari yangi g'oya va tashabbuslari bilan barcha tarmoqni olg'a tortayotgani, ular bilan birgalikda katta-katta dasturlar amalga oshirilayotgani ta'kidlandi. Bugun iqtisodiyotning turli tarmoqlarida, ayniqsa, qishloqlarda aholini daromadli qilishda ular harakatlantiruvchi kuch bo'layotir. Yuz minglab yoshlar, xotin-qizlarni kasb-hunarli qilish, tadbirkorlikka o'rgatish tajribasi ham tadbirkorlar bilan hamkorlik mahsuli.

Mukofotlanganlar sohani doimiy qo'llab-quvvatlayotgani va mehnatlariga yuksak e'tibori uchun davlatimiz rahbariga minnatdorlik bildirdi.

Shu kuni davlatimiz rahbari Yangi Toshkentdagi bunyodkorlik loyihalari taqdimoti bilan ham tanishdi.

Aytish joizki, bu shahar qurilishiga 2023-yilda tamal toshi qo'yilgan edi. Buyuk Britaniyaning "Cross-works" kompaniyasi tomonidan ishlab chiqilgan loyiha konsepsiyasiga ko'ra, Yuqori Chirchiq va O'rta Chirchiq tumanlaridan ajratilgan 19 ming 700 gektar yerda bunyodkorlik ishlari jadal olib borilyapti. Natijada bugungi kunga kelib, ilk inshootlar bo'y ko'rsatmogda.

Shahar qurilishining birinchi bosqichida 6 ming gektar maydonda inshootlar barpo etilib, 600 ming aholi uchun zamonaviy sharoitlar yaratiladi. Loyiha to'liq yakunlangach bu yangi kent 2 million nafar aholi yashaydigan so'lim makonga aylanadi.

Zamonaviy shaharda infratuzilma ham shunga yarasha sifati va uzoq muddatli bo'lishi lozim. Shu bois hozirgi kunda shaharning yer osti muhandislik tarmoqlari qurilib, bir va ikki seksiyali kollektorlar yotqizilyapti. Ular orqali markazlashgan issiqlik hamda suv quvurlari, elektr energiyasi, telekommunikatsiya kabi barcha muhandislik tarmoqlari yer ostidan o'tkaziladi. Shuningdek, transportlarning erkin qatnovi uchun tunnelar va yer osti turargohlari barpo etiladi.

Har bir loyihada zamonaviy yondashuv, mukammal yechim va yashillik e'tiborga olinmogda. Ekologik

toza transport tizimi tashkil etilib, metro va elektrobuslar harakati muvofiqlashtiriladi. Ayniqsa, piyodalar hamda velopedchilarning to'siqsiz hamda xavfsiz harakatlanishi uchun keng qulaylik yaratiladi.

Hududda 60 dan ortiq davlat idoralari uchun ma'muriy binolar barpo etiladi.

Davlatimiz rahbariga yaqin istiqbolda ko'zda tutilgan loyihalar haqida axborot berildi.

Shaharga ko'plab mahalliy va xorijiy investorlar qiziqish bildirmogda. Bugungi kunda auksionda sotilgan 13 ta tijoriy lot bo'yicha 554 million dollarlik investitsiya shartnomalari tuzilgan.

Bu yerda qad rostlaydigan mehmonxona va restoranlar, o'ziga xos dizayndagi muhtasham binolar tashrif buyuruvchilarga yuqori sifatli xizmat ko'rsatishi bilan birga, shaharni turizm markaziga aylantirishi, shubhasiz.

Hududdagi qurilish jarayonida 160 ming nafar aholining bandligi ta'minlanadi. Kelajakda esa shaharda innovatsion texnologiyaga asoslangan, yuqori daromadli yuz minglab doimiy ish o'rnlari paydo bo'ladi. Buning uchun yangi ta'lim va tibbiyot klasterlari, axborot texnologiyalari xizmatlari hamda texnoparklar tashkil etiladi.

Prezident loyihalarga investitsiyalar jalb qilish, dam olish joylari va xizmatlarni qulay yo'lga qo'yish bo'yicha tavsiyalar berdi.

“Xalq soʻzi”.

Adabiy doʻstlik – abadiy doʻstlik

SOʻZ QUDRATI

Oʻzbek va qozoq xalqlarining koʻp asrlik oʻzaro aloqalari ularning madaniyati,avvalo,ogʻzaki ijodi va adabiyotida oʻz aksini topgan.

Soʻzni qadim Turkiston piri Xoja Ahmad Yassaviydan boshlamogchi boʻlsak,sohibqiron Amir Temurning hazrat xotirasi hurmatiga mahobatli maqbara tiklaganining oʻzi – buyuk bir tarix.

Sharq adabiyoti, turkiy she'riyatda Yassaviy bobo qalamiga mansub “Devoni hikmat”ning o'rni va ahamiyati nihoyatda beqiyos. “Nasoyim ul-muhabbat” asarida Alisher Navoiy bobomiz jumladan shunday degan:

“Turkiston mulkining shayx ul-mashoyixidur. Maqomoti oliy va mashhur, karomoti mutavoliy va nomahsur ermish. Muridu as'hobi g'oyatsiz va shohu gadoning irodat va ixlosi ostonida nihoyatsiz ermish”. Oʻz navbatida, Sharq xalqlari adabiyotiga buyuk Navoiyning ta'siri nihoyatda katta. Qozoq xalqi bu ulug' zotni yaxshi biladi. Xususan, Alisher Navoiy ijodi ma'rifatparvar zot Abay Qo'nonboy o'g'lida katta mehr uyg'otdi. U qozoq adabiyotining Sharq, jumladan, o'zbek adabiyoti va madaniyati bilan aloqalari kengayishida muhim o'rin tutdi.

XIX asrning ikkinchi yarmidan ma'rifatparvarlik g'oyalari keng tarqaldi. Muqimiy, Furqat, Zavqiy, Avaz O'tar, Abay, Ibray Altinsarin ijodida bu g'oyalar o'zining chuqur ifodasini topdi.

O'zbek mualliflari asarlarini qozoq tiliga yozma tarjima qilish o'tgan asrning 30-yillarida boshlandi. Asosan, kichik hikoyalari va poetik asarlar o'g'irilgan. Qizig'i shundaki, qozoq tilidagi adabiyotlar Toshkentda chop etilgan. Bular Abdulla Qahhor hikoyalari (Is'hak o'g'li Daniyal tarjimasi, 1934) va G'ayratyning "Davri amri" (1935) qissasi edi. Keyinroq Olmaotada Hamid Olimjonning "Gullagan o'lka", Amin Umariyning "Istak" she'rlari bosilib chiqdi.

Qozoq tiliga o'zbek adabiyoti durdonalari – Alisher Navoiy asarlari, Oybek, Sharof Rashidov, Asqad Muxtor romanlari, Abdulla Qahhor hikoyalari, G'afur G'ulom, Uyg'un, Zulfia, Mirtemir she'rlari tarjima qilindi.

O'tgan asrning qirqinchi yillari Yevroosiy mintaqasi xalqlari uchun o'ta mashaqqatli kechganiga qaramasdan, 1941-yili buyuk o'zbek shoiri Alisher Navoiy tavalludining 500, 1945-yili ulug' qozoq oqini Abay tavalludining 100-yillik yubileyi keng nishonlandi. 1945-yili Olmaotada o'zbek tadbiri akademik shoirimiz G'afur G'ulom *“Abay – chinakam hurmatga arizguli alp shoir. Uning o'lanlari qozoq sahosiday bepoyon. Olatovning atlas qirlariday jimjimador. Chingiztog' sharshalariday suronli, Qozig'urt qoyalariday balanddir”*, degan edi.

Qozoq she'riyatidan tarjimalar o'zbek badiiy tarjima adabiyotida salmoqli o'rin tutadi. G'afur G'ulom, Uyg'un, Mirtemir, Zulfia, Shuhrat, Jumaniyoz Jabborov, Turob To'la, Nosir Fozilov qozoq shoirlarining she'r va dostonlarini zavqu shavq bilan o'g'irgan.

G'afur G'ulom ijodida Qozog'iston mavzusi keng o'rin egallaydi. “Qozoq xalqiga” she'rida shoir ikki xalq o'rtasidagi do'stlikni avj pardalarda tarannum etadi. Qardosh qozoq xalqiga cheksiz muhabbati

haqida so'zlar ekan, G'afur G'ulom uning iste'dodli o'g'lonlariga qoyil qoladi. Kumush ovozi va Jambul do'mirasining sozi uni lol qiladi.

O'zining ko'plab o'zbek ijodkorlari, ayniqsa, G'afur G'ulom bilan do'stligini Sobit Muqonov “O'zbek birodarlarimga” she'rida mehr bilan ifodalaydi. Qozoq xalqining turmushi, madaniyati, mehmondo'stligi, ochiq ko'ngilliligi, shahar, tog' va qirlari go'zalligini Maqsud Shayxzoda “Jambul”, Yusuf Hamdan “Ikki she'r”, Normurod Narzullayev “Mening Qozog'istonim” kabi she'rlarida haqqoniy aks ettira olgan.

O'zbekiston xalq shoiri Abdulla Oripovning “Qozog'iston” she'ridan bir go'zal tamsil:

Tiniq chashmalar bor haddan ziyoda Boqiydir Balkashning suvi ham biroyq, Biroq qozoq xalqin qalbi dunyoda Barcha chashmalardan ko'ra tiniqroq.

Ostona shahrida buyuk o'zbek shoiri va mutafakkiri Alisher Navoiyga, Toshkentda ulug' qozoq oqini Abay Qo'nonboy o'g'liga muhtasham yodgorliklar o'rnatilgani ikki xalq do'stligining yemirilmas ifodasidir. Abay ko'chasi poytaxtimizning qoq markazidan o'tadigan Alisher Navoiy nomi bilan ataladigan shohko'chaga tutashgan. Bunda naqadar chuqur ramziy ma'no borligini ikki bovuirdosh, qon-qarindosh xalq juda yaxshi anglaydi.

Ikki xalq adabiyotining zabardast vakillarini yakalat bodomday egizaklarga o'xshatish mumkin. Inchinun, Muxtor Avezov va Oybek, G'afur G'ulom va Sobit Muqonov, Abdulla Tojiboyev va Mirtemir, Abdulla Oripov va O'ljaz Sulaymonov asarlari maydonida arg'umoq surganday bir-biriga hamnafas bo'lib qalam surdi.

Keyingi yillarda O'zbekiston Respublikasi Prezidenti Shavkat Mirziyoyev va Qozog'iston Respublikasi Prezidenti Qosim-Jomart Toqayev janobi oliylarining oqilona siyosati natijasida mamlakatlarimiz o'rtasidagi o'zaro hamkorlik munosabatlari qondosh-jondosh ittifoqchilik darajasiga ko'tarildi.

2018-yil “Qozog'istonda O'zbekiston yili”, 2019-yilda esa “O'zbekistonda Qozog'iston yili” deb e'lon qilinishi munosabati bilan madaniyat, san'at, adabiyot, ilm-fan, turizm va boshqa sohalarida ko'plab tadbirlar, adabiyot kunlari, ijodiy safarlar o'tkazildi.

2018-yilda O'zbekiston va Qozog'iston Yozuvchilar uyushmalari o'rtasida imzolangan hamkorlik memorandumi ham ikki tomonlama adabiy aloqalarni rivojlantirishda muhim omil bo'lib kelmogda.

So'nggi yillarda 20 nafar yosh o'zbek shoirining she'rlari qozoq tiliga o'g'irilib, “Juz o'len” (“Yuzta she'r”) nomi bilan, 21 nafar yosh qozoq shoiri she'rlari o'zbek tilida “Yuz she'r” nomi bilan chop etilib, ikki mamlakatda taqdimotlari o'tkazildi.

2018-yil 13-mart kuni O'zbekiston Respublikasi Prezidentining “Buyuk qozoq shoiri va mutafakkiri Abay Qo'nonboyev ijodiy merosini keng o'rganish va targ'ib qilish to'g'risida”gi qarori qabul qilinishi ma'rifat olamida ulkan voqea bo'ldi. Mazkur qarorga asosan Abay Qo'nonboyevning “Saylanma” asari hamda “O'zbek va qozoq adabiy aloqalari” nomli adabiy-tahliliy maqolalar to'plami chop etildi.

Nizomiy nomidagi Toshkent davlat pedagogika universitetida “Abay va o'zbek adabiyoti” umumsarlavha ostida doimiy ko'rgazma tashkil etilgan.

Har yili shoir tug'ilgan 10-avgust sanasida Toshkent shahrida o'rnatilgan Abay Qo'nonboyev haykali poyiga gul qo'yish marosimi va mushoira tadbirlari o'tkazib kelinmogda.

O'zbekiston Prezidenti tashabbusi bilan nashr qilingan “Turkiy adabiyot durdonalari” nomli 100 jildlik asarlar majmuasining muhtasham va zalvarli o'nta jildi qozoq adabiyotiga bag'ishlangan bo'lib, undan Abay, Jambul kabi qozoq mumtoz shoirlari bilan birga Qalmaqon Abdugodirov, Sobit Muqonov, O'ljaz Sulaymonov, Anvar Olimjonov singari tanilgi qozoq shoir va yozuvchilari asarlari o'rin olgan.

2024-yil avgust oyida O'zbekiston Prezidenti Shavkat Mirziyoyev va Qozog'iston Prezidenti Qosim-Jomart Toqayev keng jamoatchilik ishtirokida Ostona shahrida buyuk shoir va mutafakkir Mir Alisher Navoiy haykalining tantanali ochilish marosimida qatnashdi.

Davlatimiz rahbari tomonidan ilgari surilgan “Adabiy do'stlik – abadiy do'stlik” shiori ostida xalqaro adabiy aloqalar yanada rivojlanmogda. Goh Toshkentda yoki Samarqandda, goh Ostona yoki Olmaotada tashkil etilayotgan adabiy tadbirlarda o'zbek va qozoq ijodkorlari, shoirlar va yozuvchilar faol qatnashmogda. Shuningdek, Qozog'istondagi “Mereke baspalari” nashriyoti bilan tuzilgan kelishuvga ko'ra, 52 nafar o'zbek yozuvchi va shoirining romanlari, hikoya va she'rlari, bolalar uchun yozgan asarlari alohida kitob holida qozoq tiliga tarjima qilinib, chop etilishi rejalashtirilgan.

“So'z – ko'ngil tilmochi”, deydi. Badiiy so'z qudrati esa mo'jizalar yaratishga qodir. Shu ma'noda, mushtarak tomirlarga ega o'zbek va qozoq xalqlarini adabiyot bugun bir-biriga yanada yaqinlashtirmogda. Ikki xalq o'rtasidagi do'stlikni, hamjihatlikni, inoqlikni mustahkamlashga hissa qo'shmogda. Ishonamizki, do'stligimiz ham, adabiy aloqalarimiz ham abadiyatga daxldor bo'lajak. Zero, akademik shoir G'afur G'ulom yozganidek:

...O'zbek eli: – o'z og'am, – deb, O'trik so'zlamas qozoq, Jekam desam, jonga tutosh, Inim desam yaqinroq. ...Ming yillarga bar tutqazmas Qondoshlik tariximiz, Ikki boshga bir manlayday Yarqiroq taqdirimiz.

Sirojiddin SAYYID, O'zbekiston xalq shoiri, Oliy Majlis Senati a'zosi.

KO'TARINKI RUH, BUNYODKOR G'OYALARNI AMALGA OSHIRISH UCHUN SAMARALI MAYDON

Bugun mamlakatimizda biznes muhiti tubdan o'zgardi, chinakam tadbirkor qiyofasi shakllandi. Ularning faoliyatiga g'ov bo'lib kelgan barcha to'siqlar bosqichma-bosqich bartaraf etildi. Ishbilarmonlarga xorijiy davlatlar bilan yaqin diplomatik aloqalarni mustahkamlash,eksport-import jarayonlarini soddalashtirish,ularning faoliyatiga asossiz aralashuv imkoniyatlarini yo'qotish – bularning barchasi biznes muhitini yaxshilash va tadbirkorlikni rivojlantirish, sohani faol kengaytirish uchun katta rag'bat berdi. Endi tadbirkorlikka qo'rquv bilan emas,balki katta ishonch,ulkan maqsad va loyihalar bilan kirib borilyapti. Davlatimiz rahbari ularni bugungi kun qahramonlari sifatida e'ozlaydi.

Munosabat

Shu bois Prezidentimizning tadbirkorlar bilan bevosita ochiq muloqoti an'anaviy tarzda yo'lga qo'yilgani nafaqat ish-bilarmonlarimizni qo'llab-quvvatlash, balki ularga ko'tarinki ruh, bunyodkor g'oyalarni amalga oshirish uchun turtki bermogda. Eng asosiysi, tadbirkorlarning muammolari, murojaat va takliflarini tinglaydigan, ularga yechim topadigan samarali tizim yaratildi.

Do'stona va ishonch ruhini beruvchi navbatdagi ochiq muloqotda ham shu kabi yutuqlar e'tirof etilishi barobarida tizimda kechiktirmay hal qilinishi lozim bo'lgan masalalarga ham ijobiy yechim aytilgidi, bu soha vakillarini nihoyatda to'lg'inantirib yubordi.

Hozir O'zbekistonda ham ilg'or, uddaburon, ishning ko'zini biladigan tadbirkorlar safi tobora kengayib borayotir. Har bir sohaga innovatsion yondashuvlar kirib kelyapti. Yangi-yangi ishlab chiqarish turlari ko'paymogda. Jumladan, ishini kichik loyihadan boshlab, biznesda tajriba va malaka to'plagan yakka tartibdagi tadbirkorlarga ko'mak berib, ularni 50 – 100 nafar odam ishlaydigan baquvvat korxonalar sohibiga aylantirish maqsadida YATT va o'zini o'zi band qilgan shaxslar uchun 2030-yilgacha maxsus huquqiy rejim joriy etildi.

Endi bunday tadbirkorlar uchun ro'yxatdan o'tishdan tortib hisobot topshirishgacha bo'lgan barcha xizmatni jamlagan raqamli platformalar yaratiladi. Bunda

tadbirkorlar kerakli hujjatlarni masofaviy biometriya va “SMS” xabarnoma orqali elektron kalitsiz imzolashi mumkin. Ishchilarga elektron hamyon orqali kunbay, soatbay maosh to'lash imkoniyati berilyapti.

Har bir tarmoqning sifati kafolatlangan, raqobatdosh 10 tadan mahsulotiga “O'zbekiston ramzi” sifat belgisini berib, ularni dunyoga tanitish uchun katta targ'ibot kampaniyasi boshlanadi.

Demak, katta korporatsiyalar yanada ko'payadi, chet el bozorlariga chiqish imkoniyatlari ortadi, mamlakatimizning eksport salohiyati sezilarli darajada yuksaladi. Albatta, bu O'zbekistonda tadbirkorlikni rivojlantirish tizimii tus olganidan dalolatdir.

Davlat rahbari ochiq muloqotda ilgari surgan yangi tashabbuslar kechaning o'zidan boshlab kuchga kirdi. “O'zbekiston Respublikasi Prezidentining tadbirkorlar bilan V ochiq muloqotida belgilangan vazifalarni amalga oshirish chora-tadbirlari to'g'risida”gi Farmon e'lon qilindi. Biznesni qo'llab-quvvatlash bo'yicha ilgari surilgan har bir yangilik soha rivojida navbatdagi muhim qadamlardan bo'lishiga ishonamiz. Tadbirkorlarimiz esa yangi O'zbekiston iqtisodiy asosini yaratishning eng faol ishtirokchisiga aylanishi, shubhasiz.

Ravshan FOZILOV, Oliy Majlis Qonunchilik palatasining Tadbirkorlik, raqobatni rivojlantirish va sanoat masalalari qo'mitasi a'zosi.

Sud qarorlarini ijro etish bosqichida da’voni qondirish instituti amaliyotga tatbiq qilinadi.

Senat qo'mitalarida

IJTIMOIY MASALALARGA OID QONUNLAR MUHOKAMADAN O'TKAZILDI



Oliy Majlis Senatining Fan, ta'lim va sog'liqni saqlash masalalari qo'mitasi majlisida ijtimoiy masalalarga oid qonunlar dastlabki tarzda muhokama qilindi.

vazifalari ochib berilmaganligi, ijtimoiy kafolatlar yetarli darajada belgilanmaganligi, sug'urta badali stavkasi, sug'urta badalini hisoblash muddatlari va tartibi, sug'urta badalini to'lash bo'yicha kechiktirish (bo'lib-bo'lib to'lash) imkoniyatini berish tartibi, davlat ijtimoiy sug'urtasi bo'yicha to'lovlar miqdorlari va davrlari aks etmaganligi ta'kidlandi.

Muhokama yakunida mazkur qonunni qayta ko'rib chiqish lozimligi yuzasidan xulosani Senat Kengashiga kiritish bo'yicha qo'mita qarori qabul qilindi. Shuningdek, majlisda "Ijtimoiy ish to'g'risida"gi qonun ham qizg'in muhokamadan o'tkazildi.

Qayd etildiki, qonunning maqsadi ijtimoiy ish sohasidagi munosabatlarni tartibga solishdan iborat. Unda ijtimoiy ish sohasidagi asosiy tushunchalar aks ettirilgan bo'lib, ijtimoiy ish sohasining asosiy tamoyillari, uni tashkil etish, tartibga solish, ijtimoiy xizmatlar va ijtimoiy yordam sohasidagi davlat nazorati, ijtimoiy xodimning majburiyatlari va faoliyatining kafolatlari belgilab berilayotganligi ta'kidlandi.

Bu bo'yicha manfaatdor vazirlik va idoralar hamda ekspertlarning takliflari eshitildi va batafsil o'rganishlardan so'ng qo'mitaning tegishli qarori qabul qilindi.

"Xalq so'zi".

YUK TASHISH QOIDALARINI BUZGANLIK UCHUN JARIMA BELGILASH KO'ZDA TUTILMOQDA

Oliy Majlis Senatining Mudofaa va xavfsizlik masalalari qo'mitasi yig'ilishida navbatdagi yalpi majlisga kiritilishi nazarda tutilgan ba'zi masalalar dastlabki tarzda muhokama qilindi.

Xususan, "O'zbekiston Respublikasining ayrim qonun hujjatlariga transport xizmati ko'rsatishni tashkil etish tizimini takomillashtirishga qaratilgan o'zgartirish va qo'shimchalar kiritish to'g'risida"gi qonun ko'rib chiqildi.

Ta'kidlanganidek, keyingi yillarda transport sohasini rivojlantirish, tashishlar xavfsizligini yuqori darajada ta'minlash va ushbu sohadagi boshqaruv tizimini takomillashtirishga qaratilgan qo'mitani islohotlar amalga oshirilmoqda.

Shu bilan birga, transportda tashishlarga nisbatan qo'yiladigan talablar va shartlarga amal qilinishi borasida tashuvchilarning mas'uliyatini kuchaytirish, ma'muriy huquqbuzarliklar to'g'risidagi ishlarni ko'rib chiqishda korruptsiyaga barham berish, transport sohasidagi nazoratning samaradorligini yanada oshirish uchun ma'muriy javobgarlik to'g'risidagi qonunchilikni qayta ko'rib chiqish zarurati yuzaga kelmoqda. Transport sohasidagi davlat boshqaruvi tizimini tubdan takomillashtirish maqsadida Transport vazirligi huzurida Transport nazorati inspeksiyasi tashkil etilganligi munosabati bilan sohadagi qonunchilikka tegishli o'zgartirish va qo'shimchalar kiritish zarurati ham mavjud.

Xususan, "Ma'muriy javobgarlik to'g'risida"gi kodeksga temir yo'l

transporti va metropolitenda harakat va tashish xavfsizligi talablarini hamda yo'lovchilar, bagaj va yuk bagajini tashish qoidalarini buzganlik uchun jarima solishga sabab bo'lishini belgilovchi qo'shimchalar kiritilmoqda.

Bundan tashqari, "Tashuvchining fuqarolik javobgarligini majburiy sug'urta qilish to'g'risida"gi, "Litsenziyalash, ruxsat berish va xabardor qilish tartib-taomillari to'g'risida"gi hamda "Transport to'g'risida"gi qonunlarga ham tegishli o'zgartirish va qo'shimchalar kiritilmoqda.

Qo'mita majlisida Samarqand viloyatining Kattaqo'rg'on shahri, Kattaqo'rg'on va Nurobod tumanlari chegaralarini o'zgartirish to'g'risidagi masala ham muhokama qilindi.

Ushbu masala aholiga munosib yashash sharoitini yaratish, buning uchun muhandislik-kommunikatsiya tizimlarini, shuningdek, ijtimoiy soha (maktab, bog'cha, shifoxona) obyektlarini barpo etish yangi ish o'rinlarini yaratishda muhim ahamiyatga ega ekanligi aytili.

Senatorlar ta'kidlaganidek, Kattaqo'rg'on shahri Samarqand viloyatining shimoliy-g'arbida joylashgan bo'lib, bugungi kunda hudud aholisi soni qariyb 95 ming kishini, umumiy yer maydoni 4,4 ming gektarni tashkil etadi.

Shahar aholisining o'sish sur'ati oxirgi besh yilda yiliga o'ttacha 1,1

ming kishiga yetmoqda. Bundan tashqari, Kattaqo'rg'on shahrida doimiy ro'yxatdan o'tmagan 4 mingga yaqin aholi va talabalar istiqomat qiladi. Aholi zichligi 1 kvadrat kilometr maydonga 9,5 kishiga to'g'ri kelib, Samarqand viloyati bo'yicha aholisi eng zich joylashgan hudud hisoblanadi.

Shu bois Senat qarori loyihasida tegishli chora-tadbirlar nazarda tutilmoqda.

Jumladan, Kattaqo'rg'on shahar hududini kengaytirish maqsadida unga chegaradosh bo'lgan Kattaqo'rg'on tumanidan 1,9 ming gektar va Nurobod tumanidan 971 gektar, jami 2,9 ming gektar yer maydonini shahar tarkibiga o'tkazish, shuningdek, Nurobod tumanining Kattaqo'rg'on tumani bilan chegaradosh bo'lgan hududlaridan 600 gektar yer maydonini Kattaqo'rg'on tumaniga o'tkazish nazarda tutilmoqda.

Senatning ushbu qarori nafaqat Kattaqo'rg'on shahrining, balki Samarqand viloyatining ham iqtisodiy o'sishini yuqori darajaga ko'tarib, jon boshiga daromad miqdorining tez o'sishini ta'minlashga, shuningdek, ushbu hududlarda yashayotgan aholining turmush farovonligini oshirishga xizmat qilishi alohida ta'kidlandi.

Majlis yakunida qo'mitaning tegishli qarorlari qabul qilindi.

"Xalq so'zi".

PEDAGOG XODIMLAR MALAKASINI OSHIRISHGA QARATILGAN KONSTRUKTIV TAKLIFLAR BERILDI

Oliy Majlis Qonunchilik palatasining Fan, ta'lim, madaniyat, sport va yoshlar masalalari qo'mitasi tomonidan "Pedagog xodimlarning malakasini oshirish tizimini qonunchilikda mustahkamlash borasida amalga oshirilayotgan ishlar hamda istiqboldagi rejalar" mavzuida davra suhbatii o'tkazildi.

Ochiq parlament

Mamlakatimizda maktabgacha va maktab ta'limi hamda oliy ta'lim tizimi faoliyatini tubdan takomillashtirish, o'quv muassasalarida o'qitishning ilg'or uslublarini joriy etish bo'yicha keng ko'lamli ishlar olib borilmoqda.

Sohani tartibga soluvchi huquqiy bazaning yanada takomillashtirilgani, "Pedagogning maqomi to'g'risida"gi, "Ta'lim to'g'risida"gi va "Innovatsion faoliyat to'g'risida"gi qonunlar ta'lim sifatini yaxshilash hamda uni xalqaro hamjamiyat bilan uyg'unlashgan holda olib

borishga keng imkoniyatlar yaratadi.

Bugungi kunda Maktabgacha va maktab ta'limi vazirligi tomonidan malaka oshirishning 6 ta shaklidan foydalanish, ya'ni ishlab chiqarishdan ajralgan holda ta'lim olish, ishlab chiqarishdan ajralmagan holda o'qish, masofaviy bilim, dual ta'lim, mustaqil o'qish va muqobil shakllarda ta'lim olish yo'lga qo'yilgan.

Maktabgacha va maktab ta'limi tashkilotlari pedagog xodimlarning malaka oshirish tizimida bir qator innovatsiyalar



joriy etilgan. Masalan, zamonaviy metodika va raqamli texnologiyalarga asoslangan modulli dasturlar ishlab chiqilgan. "Uzluksiz kasbiy ta'lim" milliy raqamli o'quv platformasi (LMS) orqali esa masofaviy ta'lim yo'lga qo'yilgan.

Davra suhbatida oliy va kasbiy ta'lim tashkilotlari, akademik litseylar hamda pedagog kadrlari malakasini oshirish borasida bajarilayotgan ishlar holatiga ham e'tibor qaratildi.

Qayd etilganidek, ayni paytda 6 ta institut, 5 ta mintaqaviy hamda 16 ta tarmoq muassasalarida oliy va kasbiy ta'lim tashkilotlari hamda akademik litsey rahbar va pedagog kadrlarining uzluksiz

malaka oshirib borishi yo'lga qo'yilgan. Oliy hamda kasbiy ta'lim tashkilotlari, akademik litseylar rahbar va pedagog kadrlarining malakasini oshirish tizimi to'liq raqamlashtirilgan. 2023 – 2025-yillarda 102 tadan ortiq davlat oliy ta'lim tashkilotlarining 26 681 nafar rahbar va pedagog kadrlari 223 ta yo'nalishda malaka oshirish kurslarida o'qitildi.

Tadbirda istiqbolda pedagog xodimlarning malakasini oshirish tizimini yanada optimallashtirish maqsadida oliy va kasbiy ta'lim tashkilotlari hamda akademik litseylarning rahbar va pedagog kadrlarining malakasini oshirishning yagona yaxlit tartibini joriy etish bo'yicha bir qator takliflar ilgari surildi.

Yakunda amaliy takliflar va chora-tadbirlar rejasini shakllantirish, parlament nazorati mexanizmlari orqali ularning ijrosini ta'minlash choralari ko'rish bo'yicha muhim vazifalar belgilab olindi.

Ismoil ESHMAMATOV,
Oliy ta'lim, fan va innovatsiyalar vazirligi bosh mutaxassisi:

– Ta'lim jarayonining sifatini ta'minlash, talabalarga zamonaviy bilim berish, ilmiy-amaliy faoliyatni rivojlantirish kabi vazifalarni samarali uddalash uchun pedagog xodimlar uzluksiz ravishda malakasini oshirib borishi lozim.

Mazkur jarayonda oliy va kasbiy ta'lim tashkilotlari, akademik litseylar rahbar va pedagog kadrlarining malakasini oshirish

Sirojiddin QODIROV,
Maktabgacha va maktab ta'limi vazirligi bo'lim boshlig'i:

– Bugungi kunda vazirlik tizimida 10 146 ta umumiy o'rta ta'lim maktabi, 6 817 ta maktabgacha ta'lim tashkiloti bor. Ularda 538 009 nafar o'qituvchi va 120 320 nafar tarbiyachi faoliyat yuritmoqda. Bundan tashqari, nodavlat maktabgacha ta'lim tashkilotlarining 15 506 nafar va nodavlat umumiy o'rta ta'lim tashkilotlarining 14 834 nafar pedagog xodimlari mavjud.

Vazirligimiz tomonidan pedagog xodimlarni malaka oshirishga jalb qilish bo'yicha muayyan ishlar olib borilmoqda. Masalan,

tizimi to'liq raqamlashtirilgani e'tiborga molik. Masofaviy malaka oshirish kurslari maxsus masofaviy ta'lim tizimida tashkil etilishi ham g'oyat muhim ahamiyatga ega.

Bugungi uchrashuvimiz davomida soha vakillari bilan tizimdagi ayrim masalalarni bartaraf etish yuzasidan fikr almashdik, qonunchilikni takomillashtirish bo'yicha muhim takliflar berdik. Bu esa ta'limda sifat bilan birga, o'qituvchi kasbi nufuzining oshishiga imkon beradi.

shu yilning o'tgan davrida 893 nafar maktabgacha ta'lim tashkiloti direktori, 380 nafar direktorlikka nomzod menejerlik o'quv kurslarida o'qitildi. Yanvar – iyun oylarida esa 107 nafar pedagog xodim xorijiy ta'lim muassasalarida malaka oshirdi va stajirovkada bo'ldi.

Ishonchim komilki, bugungi davra suhbatii o'zaro tajriba almashish, mavjud masalalarni birgalikda bartaraf etishda o'ziga xos platforma bo'ladi. Bunday munozaralarda ko'tarilgan takliflar esa o'qitishning ilg'or uslublarini joriy etish va sohaning huquqiy asoslarini takomillashtirishga zamin yaratadi.

"Xalq so'zi".

MEHR VA HAMDARDLIK – INSON HUQUQLARI HIMOYASINING YUKSAK IFODASI

Dunyoda tinchlik va xotirjamlikka muhtoj millionlab insonlar orasida falastinliklar taqdiri, ayniqsa, og'ir. Ko'p yillik mojaro, qur'olli to'qnashuvlar va inqirozlar natijasida minglab oilalar uy-joyidan, tinch hayotidan ayrilgan. Shu sharoitda O'zbekistonning ularni ma'naviy va moddiy jihatdan qo'llab-quvvatlashi – nafaqat diplomatik yoki gumanitar qadam, balki inson huquqlarini amaliy ta'minlash yo'lidagi katta siyosiy irodadir.

Munosabat

2023-yilda davlatimiz Falastin xalqini qo'llab-quvvatlash uchun 1,5 million AQSH dollari ajratgan edi. Endi esa falastinliklarning bir guruhi O'zbekistonga olib kelinib, ular uchun uy-joy, ijtimoiy nafaqa, ta'lim va tibbiy xizmat kabi barqaror hayotni ta'minlaydigan shart-sharoit yaratilmoqda.

Prezidentimiz tomonidan imzolangan Farmonga muvofiq, falastinlik fuqarolar vaqtincha

yashash joylari, tibbiy ko'rik va zarur dori-darmonlar bilan ta'minlandi.

Shuningdek, ularning sog'lig'ini asrash, keksa yoshdagi shaxslarga nafaqa tayinlash, uy-joy ijara xarajatlarini qoplash, bir martalik moddiy yordam berish, farzand tuq'alganda va dafn uchun nafaqa to'lash kabi mexanizmlar ishga tushiriladi. Mehnatga layoqatli shaxslar kasb-hunarga o'qitilib, tadbirkorlik dasturlariga jalb qilinadi.

Farmonning muhim jihatlaridan yana biri – nogironlikka olib keluvchi og'ir kasallikka chalingan mehmonlarga davolanish muddatidan qat'i nazar, nogironlik belgilash to'g'risidagi normadir. Odatda, nogironlik rasmiylashtirilishi ma'lum davolanish jarayonidan keyin amalga oshiriladi. Bu esa vaqt talab qiladi. Ammo og'ir ahvoldagi mehmonlar bir kun ham ijtimoiy himoyadan mahrum qolmasligi uchun davlatimiz rahbari tashabbusi bilan ularga nogironlikni kechiktirmasdan belgilash imkoniyati yaratildi.

Boshqa davlatlarda qochoqlar ko'pincha faqat xayriya yoki qisqa muddatli yordamga qarab qoladi. O'zbekiston tanlagan yo'l esa yanada insoniy. Farmonga ko'ra, har bir mehnatga layoqatli mehmon uchun har

oy minimal iste'mol xarajatlari miqdorida yashash nafaqasi joriy etiladi. Bu esa ularning kundalik ehtiyojlari davlat tomonidan kafolatlanishini anglatadi. Mazkur nafaqa qisqa muddatli xayriya yordami emas, balki ularning barqaror iqtisodiy tayanchga ega bo'lib, jamiyatga moslashuviga ko'maklashadigan mexanizmdir.

Ushbu kompleks choralar nafaqat boshpana, balki ularga hayotlarini yangi sahifadan boshlash va oyoqqa turishlariga, tinchlik hamda xavfsizlik ne'matidan bahramand bo'lishiga zamin yaratadi. Bu nafaqat davlat rahbarining insoniylik va adolatga sadoqatini, balki butun xalqimizning yuksak ma'naviy madaniyatini ko'rsatadi.

Feruza ESHMATOVA,
Oliy Majlisning Inson huquqlari bo'yicha vakili (ombudsman).

Mahallalarda bosqichma-bosqich mahalla huquq-tartibot maskanlari faoliyati yo'lga qo'yiladi.

Xalq so'zi
Narodnoe slovo

MUASSISLAR:
O'zbekiston Respublikasi Oliy Majlisi
Qonunchilik palatasi Kengashi
O'zbekiston Respublikasi Oliy Majlisi
Senati Kengashi

Bosh muharrir O'tkir RAHMAT

2020-yil 25-martda O'zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligida 0001-raqam bilan ro'yxatga olingan. Nashr indeksi — 229. Buyurtma G 642, 13 107 nusxada bosildi. Hajmi — 2 taqob. O'fset usulida bosilgan. Qog'oz bichimi A-2. Bahosi kelishilgan narxda.

Gazetamiz haqidagi ma'lumotlarni yuklab olish uchun QR-kodni telefoningiz orqali skaner qiling.

TELEFONLAR:
Devonxona 71-259-74-51; kotibiyat 71-259-74-53;
e'lonlar 71-259-74-55.

ISSN 2010-8788

Tahriyrga kelgan qo'lyozmalar taqzir qilinmaydi va ummifga qaytarilmaydi.

Gazetaning yetkazib berilishi uchun ommaviy rasmiylashtirgan tashkilot javobgar.

Gazeta tahriyrga kompyuter markazida teriladi hamda operator M. Begmuratov tomonidan sahifalandi.

Gazetaning poligrafik jihatdan sifati chop etilishiga "Sharq" nashriyot-matbaa aksiyadorlik kompaniyasi mas'ul. Bosmaxona telefoni: 71-233-11-07.

MANZILIMIZ:
100066,
Toshkent shahri,
Islom Karimov ko'chasi, 55-uy.
Navbatchi muharrir N. Ostono.
Musahhih Sh. Mashrabboyev.

"Sharq" nashriyot-matbaa aksiyadorlik kompaniyasi bosmaxonasi. Korxona manzili:
Buyuk Turon ko'chasi, 41. O'ZA yakuni — 01.28 Topshirildi — 01.40 **1 2 3 4 5 6**